

北京時間:4月25日 21:00

本期主持:天儀

參考:《清真集箋注》上海古籍2008 (PDF P138-P172)

01

—
鶴沖天

梅雨霽，暑風和，高柳亂蟬多。小園臺榭遠池波，魚戲動新荷。

薄紗廚，輕羽扇，枕冷簟涼深院。此時情緒此時天，無事小神仙。

02

—
鶴沖天

白角簟，碧紗廚。梅雨乍晴初。謝家池畔正清虛。香散嫩芙蕖。

日流金，風解愠。一弄素琴歌舞。慢搖紈扇訴花箋。吟待晚涼天。

03

風流子

新綠小池塘，風簾動、碎影舞斜陽。羨金屋去來，舊時巢燕，土花繚繞，前度莓牆。繡閣鳳幃深幾許，聽得理絲簧。欲說又休，慮乖芳信，未歌先咽，愁近清觴。遙知新妝了，開朱戶、應自待月西廂。最苦夢魂，今宵不到伊行。問甚時說與，佳音密耗，寄將秦鏡，偷換韓香。天便教人，霎時厮見何妨。

04

過秦樓

水浴清蟾，葉喧涼吹，巷陌馬聲初斷。閒依露井，笑撲流螢，惹破畫羅輕扇。人靜夜久凭欄，愁不歸眠，立殘更箭。歎年華一瞬，人今千里，夢沈書遠。空見說、鬢怯瓊梳，容消金鏡，漸嬾趁時勻染。梅風地溽，虹雨苔滋，一架舞紅都變。誰信無繆為伊，才減江淹，情傷荀倩。但明河影下，還看稀星數點。

05

側犯

暮霞霽雨，小蓮出水紅妝靚。風定，看步襪江妃照明鏡。飛螢度暗草，秉燭遊花徑。人靜，攜豔質、追涼就槐影。

金環皓腕，雪藕清泉瑩。誰念省、滿身香，猶是舊荀令。見說胡姬，酒壚寂靜，煙鎖漠漠，藻池苔井。

06

紅林擒近

高柳春纔軟，凍梅寒更香。暮雪助清峭，玉塵散林塘。那堪飄風遞冷，故遣度幕穿窗。似欲料理新妝，呵手弄絲簧。

冷落詞賦客，蕭索水雲鄉。援毫授簡，風流猶憶東梁。望虛檐徐轉，回廊未掃，夜長莫惜空酒觴。

07

紅林擒近

風雪驚初霽，水鄉增暮寒。樹杪墮飛羽，檐牙挂琅玕。纔喜門堆巷積，可惜迤邐消殘。漸看低竹翩翩，清池漲微瀾。

步履晴正好，宴席晚方歡。梅花耐冷，亭亭來入冰盤。對前山橫素，愁雲變色，放杯同覓高處看。

08

醜奴兒

肌膚綽約真仙子，來伴冰霜，洗盡鉛黃，素面初無一點妝。

尋花不用持銀燭，暗裡聞香，零落池塘，分付余妍與壽陽。

09

玉燭新

溪源新臘後。見數朶江梅，翦裁初就。暈酥砌玉，芳英嫩、故把春心輕漏。前村昨夜，想
弄月黃昏時候。孤岸峭、疏影橫斜，濃香暗霑襟袖。

尊前賦與多材，問嶺外風光，故人知否。壽陽謾鬪。終不似、照水一枝清瘦。風嬌雨秀。
好亂插繁花盈首。須信道、羌管無情，看看又奏。

10

菩薩蠻

銀河宛轉三千曲，浴鳧飛鷺澄波綠。何處是歸舟，夕陽江上樓。

天憎梅浪發，故下封枝雪。深院捲簾看，應憐江上寒。

11

三部樂

浮玉霏瓊，向邃館靜軒，倍增清絕。夜窗垂練，何用交光明月。近聞道、官閣多梅，趁暗香未遠，凍蘂初發。倩誰摘取，寄贈情人桃葉。

迴文近傳錦字，道爲君瘦損，是人都說。祇知染紅著手，膠梳黏髮。轉思量、鎮長墮睫。都只爲、情深意切。欲報消息無一句，堪愈愁結。

12

花犯

粉牆低，梅花照眼，依然舊風味。露痕輕綴。疑淨洗鉛華，無限佳麗。去年勝賞曾孤倚，冰盤同宴喜。更可惜、雪中高樹，香篝熏素被。

今年對花最慙慙，相逢似有恨，依依愁悴。吟望久，青苔上、旋看飛墜。相將見、脆丸薦酒，人正在、空江煙浪裏。但夢想、一枝瀟灑，黃昏斜照水。

13

品令

夜闌人靜。月痕寄、梅梢疏影。簾外曲角欄干近。舊攜手處，花霧寒成陣。

不禁愁與恨，縱相逢難問，黛眉曾把春衫印。後期無定，腸斷香消盡。

14

西河

佳麗地，南朝盛事誰記。山圍故國繞清江，髻鬟對起。怒濤寂寞打孤城，風檣遙度天際。

斷崖樹猶倒倚。莫愁艇子曾繫。空余舊跡鬱蒼蒼，霧沈半壘。夜深月過女牆來，賞心東望淮水。

酒旗戲鼓甚處市。想依稀、王謝鄰里。燕子不知何世。入尋常、巷陌人家相對，如說興亡斜陽裏。

15

迎春樂

清池小圃開雲屋。結春伴、往來熟。憶年時、縱酒杯行速，看月上，歸禽宿。

牆裏修篁森似束，記名字、曾刊新綠。見說別來長，沿翠蘚、封寒玉。